

Na osnovu člana 8 Zakona o Službenom glasniku Brčko distrikta BiH («Službeni glasnik Brčko distrikta BiH», brojevi: 1/00 i 17/04), Odluke o davanju ovlaštenja Zakonodavnoj komisiji Skupštine Brčko distrikta BiH broj 01-02-218/17 od 13. 9. 2017. godine, Zakonodavna komisija Skupštine Brčko distrikta BiH na 40. sjednici održanoj 25. 4. 2018 godine utvrdila je prečišćeni tekst Zakona o sudskoj policiji Brčko distrikta BiH («Službeni glasnik Brčko distrikta BiH», broj 42/04) s izmjenama i dopunama Zakona o sudskoj policiji Brčko distrikta BiH («Službeni glasnik Brčko distrikta BiH», brojevi: 19/07, 2/08, 31/11).

Broj: 01.3-05-462/18

Brčko, 25. 04. 2018 godine

**PREDSJEDAVAJUĆI  
ZAKONODAVNE KOMISIJE  
Ljubiša Lukić, s. r.**

**ZAKON  
O SUDSKOJ POLICIJI BRČKO DISTRIKTA BiH  
(PREČIŠĆEN TEKST)**

**I. OSNOVNE ODREDBE**

**Član 1**

Ovim zakonom osniva se Sudska policija, definišu njena ovlaštenja, organizacija i sredstva za rad, prava i obaveze, radni odnosi te druga pitanja od važnosti za organizaciju i rad Sudske policije Brčko distrikta Bosne i Hercegovine (u daljnjem tekstu: Sudska policija).

**Član 2**

Sudska policija vrši dužnosti iz svoje nadležnosti kao što je propisano zakonom. Posebna pravila i propise koji se tiču dužnosti Sudske policije donosi Pravosudna komisija Brčko distrikta BiH (u daljnjem tekstu: Pravosudna komisija) na prijedlog predsjednika Pravosudne komisije.

**Član 3**

Sastav osoblja zaposlenog u Sudskoj policiji u principu odražava nacionalni sastav stanovništva u Brčko distriktu Bosne i Hercegovine.

**Član 4**

Predsjednik Pravosudne komisije je odgovoran za rukovođenje Sudskom policijom, a komandir Sudske policije je odgovoran za operativnu kontrolu i izvršavanje svakodnevnih tekućih obaveza Sudske policije.

**II. OVLAŠTENJA SUDSKE POLICIJE**

## **Član 5**

(1) Sudska policija pruža pomoć Apelacionom i Osnovnom sudu Brčko distrikta BiH (u daljnjem tekstu: sudovi Distrikta) kao što je propisano zakonom, u smislu pribavljanja informacija, izvršavanja naloga suda za dovođenje učesnika u sudskom postupku prema nalogima sudova Distrikta, sprovođenja osuđenih lica u ustanove za izvršenje sankcija izrečenih presudama suda, održavanja reda u sudnici, obezbjeđivanja sudija i službenika suda, kao i drugih lica unutar suda, internog obezbjeđivanja zgrade suda, te izvršavanja drugih naloga suda.

(2) Sudska policija u skladu sa ovim zakonom također pruža pomoć u obezbjeđivanju uvida u službenu dokumentaciju, uključujući sudske i upravne spise, a naročito prilikom pribavljanja neophodnih informacija, dokumenata i spisa u slučaju pružanja otpora ili nesaradnje od bilo kojeg službenika u toku istrage.

(3) Sudska policija provodi naloge suda koji se odnose na pretres imovine i lica, na privremeno oduzimanje predmeta, na obezbjeđivanje provođenja izvršnih naloga suda, kao i drugih naloga suda, čiji je cilj preduzimanje koraka kojima se osigurava uspješno odvijanje datog sudskog postupka. Sudska policija u cilju ekspertize ili operativne podrške može zatražiti pomoć službi za provođenje zakona Bosne i Hercegovine ili entiteta.

## **Član 6**

Predsjednik Pravosudne komisije na zahtjev glavnog tužioca Brčko distrikta BiH (i direktora Kancelarije za pravnu pomoć Brčko distrikta BiH) sklapa posebni sporazum o pružanju pomoći Sudske policije Tužilaštvu (i Kancelariji za pravnu pomoć) Brčko distrikta BiH.

### **III. ORGANIZACIJA I SREDSTVA ZA RAD SUDSKE POLICIJE**

## **Član 7**

Unutrašnja organizacija Sudske policije reguliše se podzakonskim aktima koje na prijedlog predsjednika Pravosudne komisije donosi Pravosudna komisija.

## **Član 8**

(1) Komandir Sudske policije rukovodi radom Sudske policije na način definisan propisima koje donosi Pravosudna komisija .

(2) Za komandira Sudske policije može biti postavljeno svako lice koje ima VII stepen stručne spreme i 7 godina radnog iskustva u policijskim agencijama ili iskustva na sličnim zadacima u službama za provođenje zakona.

(3) Komandira Sudske policije imenuje Pravosudna komisija.

## **Član 8a)**

(Zamjenik komandira Sudske policije)

(1) Komandiru Sudske policije u obavljanju poslova pomaže zamjenik komandira Sudske policije (u daljnjem tekstu: zamjenik komandira).

(2) Zamjenik komandira obavlja poslove i zadatke koje mu povjeri komandir Sudske policije i u pogledu izvršavanja tih poslova odgovoran je komandiru Sudske policije.

(3) Kada je komandir Sudske policije odsutan ili spriječen da rukovodi radom Sudske policije, zamjenjuje ga zamjenik komandira s jednakim ovlaštenjima, pravima i obavezama koje po osnovu rukovođenja ima komandir Sudske policije.

(4) Za zamjenika komandira može biti postavljeno svako lice koje ima VI/VII stepen stručne spreme i 5 godina radnog iskustva u policijskim agencijama ili iskustva na sličnim zadacima u službama za provođenje zakona.

### **Član 9**

Pravosudna komisija na prijedlog predsjednika Pravosudne komisije određuje ukupan broj službenika Sudske policije.

### **Član 10**

Sredstva za rad Sudske policije obezbjeđuju se iz budžeta Brčko distrikta BiH.

### **Član 11**

Predsjednik Pravosudne komisije odobrava sve vrste nabavki za potrebe Sudske policije u skladu sa Instrukcijom o postupku nabavke roba, obavljanju usluga i ustupanju radova u Brčko distriktu BiH.

## **IV. PRAVA I OBAVEZE PRIPADNIKA SUDSKE POLICIJE**

### **Član 12**

(1) Službenici Sudske policije su naoružani i uniformisani.

(2) Službeniku Sudske policije izdaje se službena legitimacija koja potvrđuje njegovu funkciju službenika Sudske policije i njegovo pravo da nosi i koristi oružje.

(3) Pravosudna komisija propisuje formu i izgled, te izdaje službene legitimacije službenicima Sudske policije.

### **Član 13**

U okviru obavljanja svojih dužnosti ili zadataka, službenici Sudske policije dužni su štitići ljudske živote i dostojanstvo, te na odgovarajući način reagovati u situacijama u kojima su ovi interesi ugroženi. U tim prilikama oni smiju primjenjivati samo ona sredstva prisile koja su određena ovim zakonom, a koja su apsolutno neophodna i kojima se postiže uspješno obavljanje njihovih dužnosti i zadataka uz minimum štetnih posljedica; u suprotnom će se smatrati odgovornima u skladu sa ovim i drugim relevantnim zakonskim propisima.

### **Član 14**

(1) Službenici Sudske policije prilikom obavljanja svojih dužnosti mogu pribjeći upotrebi odgovarajuće i neophodne proporcionalne sile samo u slučajevima kada je ona neophodna da bi se spriječio fizički napad na samog službenika Sudske policije koji je na zadatku, na sudije, tužioce, ostale službenike Suda, te bilo koja druga lica za čiju su

zaštitu oni zaduženi, a također i u cilju sprečavanja bijega svjedoka, osumnjičenih i osuđenih lica ili nanošenja materijalne štete sudu.

(2) Proporcionalna fizička prisila može se primijeniti također i kada je to neophodno radi savladavanja otpora lica na koje se odnosi izvršenje naloga suda.

### **Član 15**

(1) Ukoliko primjenom metoda prisile iz člana 14 ovog zakona službenik Sudske policije ne može osigurati zaštitu ili obavljanje svojih dužnosti, dozvoljava se upotreba vatrenog oružja ukoliko ne postoji nikakav drugi način da se:

- a. zaštite životi koje je taj službenik u obavezi da štiti;
- b. izbjegne trenutni napad kojim se ugrožava njegov život ili životi sudija, tužilaca ili drugih službenika suda, te drugih lica koje je taj službenik u obavezi da štiti;
- c. spriječi bijeg osumnjičenog, optuženog ili osuđenog lica kojeg taj službenik čuva, privodi ili sprovodi, ukoliko specifične okolnosti opravdavaju bojazan da bi takvo lice moglo upotrijebiti vatreno oružje protiv nekog trećeg lica ili ako se takav razvoj događaja može naslutiti iz načina izvršenja, posljedica ili drugih okolnosti krivičnog djela koje je to lice počinilo.

(2) Kada postoji opravdan razlog za upotrebu vatrenog oružja, službenik Sudske policije će se, ukoliko je to moguće, prvo predstaviti i uputiti jasno upozorenje da će upotrijebiti vatreno oružje.

(3) Službenik Sudske policije daje dovoljno vremena da se njegovo upozorenje poštuje, osim u situacijama kada bi ga to izložilo riziku ili ozbiljno ugrozilo život ili tijelo drugih lica ili kada okolnosti nameću potrebu za trenutnom akcijom.

(4) Službenik Sudske policije je prilikom upotrebe vatrenog oružja dužan štiti živote drugih lica, uz obavezu da odmah podnese pismeni izvještaj komandiru Sudske policije o svakoj takvoj upotrebi vatrenog oružja. Komandir Sudske policije je obavezan da predsjedniku Pravosudne komisije odmah podnese pismeni izvještaj o svakoj upotrebi sredstava prisile i vatrenog oružja.

(5) Službenici Sudske policije ne smiju ispaljivati hlice upozorenja niti pucati na vozila u pokretu u situacijama kada je u toku potjera, osim ako se dato vozilo koristi kao sredstvo za nanošenje povreda službenicima Sudske policije ili drugim licima, ili ako je to neophodno kako bi se spriječilo nanošenje teških ili smrtnih povreda uzrokovanih hicima iz vatrenog oružja ispaljenim na službenike Sudske policije ili druga lica.

### **Član 16**

(1) Službenik Sudske policije koji svoje zadatke izvršava kao dio grupe, vatreno oružje može koristiti samo po naredbi zapovjednika te grupe.

(2) Naredba za upotrebu vatrenog oružja iz stava 1 ovog člana može se izdati samo u slučajevima i u uslovima određenim ovim zakonom.

### **Član 17**

Predsjednik Pravosudne komisije donosi detaljne propise o upotrebi vatrenog oružja i drugih sredstava prisile.

## Član 18

Prilikom hapšenja osumnjičenog, optuženog ili osuđenog lica koje se sprovodi u ustanovu za izvršavanje sankcija, službenik Sudske policije može stupiti na tuđu imovinu ili ući u tuđe prostorije u skladu sa odredbama Zakona o krivičnom postupku Brčko distrikta Bosne i Hercegovine i drugim zakonima.

## Član 19

(1) Ukoliko je protiv službenika Sudske policije pokrenut ili se vodi krivični, prekršajni ili parnični postupak zbog upotrebe vatrenog oružja, sredstava prisile ili drugih intervencija u toku obavljanja ili u vezi sa vršenjem dužnosti ili zadataka, Pravosudna komisija će za to lice na sudu obezbijediti odbranu i pružiti svaku drugu pravnu podršku u vezi sa vođenjem tog postupka.

(2) Pravna podrška se takođe pruža i službeniku Sudske policije ili ako je potrebno i njegovoj porodici, ukoliko su oni žrtve u postupku za naknadu za pretrpljenu štetu, ako mu je ta šteta nanesena u toku obavljanja ili u vezi sa vršenjem službenih dužnosti i zadataka.

(3) Brčko distrikt BiH neće pružati pravnu podršku iz stavova 1 i 2 ovog člana službeniku kojem je u konkretnom predmetu izrečena disciplinska mjera prekida radnog odnosa zbog namjernog kršenja ili zloupotrebe ovlaštenja u toku obavljanja svojih dužnosti i zadataka ili u slučaju da je Brčko distrikt BiH podnio krivičnu prijavu protiv tog službenika.

## Član 20

(1) Lica koja na zahtjev službenika Sudske policije ili na svoju vlastitu inicijativu pruže pomoć u savladavanju lica koje pruža otpor ili u hvatanju bjegunca, a koja tom prilikom pretrpe ozljedu, dobiju neku bolest ili na duže vrijeme budu onemogućena da obavljaju svoje poslove, imaju pravo na naknadu.

(2) U slučaju da lice iz stava 1 ovog člana izgubi život prilikom pružanja pomoći službeniku Sudske policije, troškove sahrane snosi Sudska policija.

(3) U slučaju iz stava 2 ovog člana, porodica ili lice koje je izdržavao poginuli ima pravo na jednokratnu finansijsku pomoć koja ne može biti manja od iznosa ukupne plaće koju je poginuli ostvario u posljednjih šest mjeseci. Ukoliko je poginuli bio nezaposlen, iznos ove finansijske pomoći određuje Pravosudna komisija, ali ona ne može biti manja od prosječne plaće u Brčko distriktu BiH.

(4) Porodici ili licu koje je poginuli izdržavao pripadaju prava shodno zakonima Brčko distrikta BiH.

## Član 21

(1) Službenici Sudske policije obavezni su čuvati službenu tajnu.

(2) Pravosudna komisija određuje šta se tačno podrazumijeva pod službenom tajnom, zatim način čuvanja službene tajne, te uslove za izuzeće od obaveze čuvanja službene tajne.

## V. ZAPOŠLJAVANJE I DISCIPLINSKA ODGOVORNOST

### 1. ZAPOŠLJAVANJE

## **Član 22**

### **(Zapošljavanje i radni odnosi)**

Zakon o službenicima i namještenicima u pravosuđu Brčko distrikta BiH (u daljnjem tekstu: Zakon o službenicima i namještenicima) i podzakonski akti doneseni na osnovu Zakona o službenicima i namještenicima shodno se primjenjuju i na zapošljavanje i radne odnose u Sudskoj policiji..

## **Član 23**

### **(Zdravstvena i psihofizička spremnost)**

(1) Pored uslova propisanih Zakonom o službenicima i namještenicima i podzakonskim aktima donesenim na osnovu Zakona o službenicima i namještenicima, lice koje se zapošljava kao službenik Sudske policije mora ispunjavati zdravstvene i psihofizičke uslove u skladu sa standardima propisanim za službenike policije, kao što je definisano propisima koje donosi Pravosudna komisija.

(2) Odgovarajuća zdravstvena ustanova koju određuje Pravosudna komisija ocjenjuje zdravstvenu i psihofizičku spremnost lica iz stava 1 ovog člana.

## **Član 24**

Pravosudna komisija reguliše sva prava i obaveze koje se odnose na zapošljavanje, zdravstveno, penziono i invalidsko osiguranje, kao i sva druga prava koja se odnose na rad Sudske policije.

## **Član 24a**

### **(Materijalna prava službenika Sudske policije)**

(1) Službenici Sudske policije ostvaruju materijalna prava u skladu sa Zakonom o službenicima i namještenicima i Zakonom o platama i naknadama zaposlenih u pravosuđu Brčko distrikta BiH (u daljnjem tekstu: Zakon o platama i naknadama), ukoliko za pojedina prava ovim ili drugim zakonom nije drugačije propisano.

(2) Osnovna plata službenika Sudske policije obračunava se na osnovu Zakona o platama i naknadama, u skladu s činom koji je službeniku dodijeljen, na način da svakom činu pripada odgovarajući platni razred propisan Zakonom o platama i naknadama. „

## **Član 24b**

### **(Čin službenika Sudske policije)**

(1) Službeniku Sudske policije dodjeljuje se jedan od sljedećih činova:

- a) Sudski policajac
- b) Stariji sudski policajac
- c) Narednik Sudske policije
- d) Stariji narednik Sudske policije
- e) Mlađi inspektor Sudske policije
- f) Inspektor Sudske policije
- g) Samostalni inspektor Sudske policije

h) Glavni inspektor Sudske policije

(2) Uslovi i postupak sticanja, napredovanja i gubitka čina, visina platnog razreda koji pripada svakom činu kao i izgled čina, utvrđuju se Pravilnikom o činovima i oznakama u Sudskoj policiji (u daljnjem tekstu: Pravilnik o činovima), koji na prijedlog komandira Sudske policije donosi Pravosudna komisija.

### **Član 24c**

#### **(Beneficirani penzijski staž)**

Službenicima Sudske policije svakih efektivno provedenih 12 (dvanaest) mjeseci na poslovima i zadacima računa se kao 16 mjeseci staža osiguranja.

## **2. DISCIPLINSKA ODGOVORNOST**

### **Član 25**

Službenici Sudske policije snose disciplinsku odgovornost za kršenja svoje radne obaveze.

### **Član 26**

Postupak za utvrđivanje disciplinske odgovornosti službenika Sudske policije pokreće se i vodi u skladu s Pravilnikom o disciplinskoj odgovornosti Sudske policije Brčko distrikta BiH.

### **Član 27**

(1) Službenik Sudske policije može se privremeno suspendovati sa radnog mjesta na koje je bio određen ili iz Sudske policije ukoliko je protiv njega pokrenut disciplinski postupak zbog teže povrede radne obaveze ili krivični postupak za krivično djelo počinjeno iz nehata, a obavezno se suspenduje iz Sudske policije ako se vodi krivični postupak za krivično djelo počinjeno sa umišljajem. Ovu suspenziju izriče komandir Sudske policije ukoliko se na osnovu prirode krivičnog djela ili ozbiljnosti navodne povrede radne obaveze, okolnosti pod kojima su to djelo ili povreda počinjeni, kao i drugih okolnosti, može osnovano zaključiti da bi po interese Sudske policije bilo štetno ako bi taj službenik Sudske policije ostao na položaju na koji je određen ili u Sudskoj policiji uopće.

(2) U slučaju iz stava 1 ovog člana, službeniku Sudske policije koji je privremeno udaljen iz službe oduzima se oružje, službena legitimacija i značka, a također ne smije nositi uniformu za vrijeme trajanja suspenzije. Ovom službeniku se također može smanjiti ili suspendovati plaća, a može se i rasporediti na kancelarijske poslove za vrijeme trajanja suspenzije.

(3) Suspendovani službenik Sudske policije koji ima porodicu koju izdržava, ima za vrijeme trajanja suspenzije, pravo na 85% od svoje plate u mjesecu koji je prethodio suspenziji

## **VI. PRIJELAZNE I ZAVRŠNE ODREDBE**

### **Član 28**

Pravosudna komisija u roku od 30 dana od dana stupanja na snagu ovog zakona donosi propise neophodne za primjenu odredbi ovog zakona.

## **Član 28a**

### **(Status postojećih službenika)**

- (1) Postojeći službenici Sudske policije (u daljnjem tekstu: postojeći službenici) zadržavaju radno-pravni status, čin koji im je dodijeljen po ranijim propisima kao i ostala prava iz radnog odnosa stečena do dana stupanja na snagu ovog zakona.
- (2) Izuzetno od stava 1 ovog člana postojeći službenici zadržavaju čin dodijeljen po ranijim propisima i prava koja im po osnovu tog čina pripadaju najdalje do konačnosti odluke o dodjeli čina, pripadajućeg platnog razreda (u daljnjem tekstu: odluka o dodjeli čina) donesenoj u skladu s ovim zakonom i Pravilnikom o činovima.
- (3) Odluku o dodjeli čina, na prijedlog komandira Sudske policije, donosi Pravosudna komisija, u roku od 30 dana od dana stupanja na snagu Pravilnika o činovima.
- (4) Obračun i isplata plata postojećim službenicima u skladu s odredbama ovog zakona, započinje danom konačnosti odluke o dodjeli čina.

## **Član 29**

### **( Stupanje na snagu)**

Zakon o sudskoj policiji Brčko distrikta BiH stupio je na snagu 19. novembra 2004. godine, a njegove izmjene i dopune 17. jula 2007. godine, 20. februara 2008. godine i 12. oktobra 2011. godine.